

大乘阿毗達磨雜集論述記卷第二十七

唐京兆大慈恩寺沙門窺基撰

生般涅槃補特伽羅者謂二結俱未斷纔生色界已
即便聖道現前得盡苦際。

生般中二結者謂生起二結廣如前說。但般有餘
非無餘。此小乘義。今大乘若以相分亦可同此身
滅智盡方般無餘。若約實說金剛心時已得無餘
未來諸果令業不感故。種子不生故。相說同前此
人但起苦集八行即般涅槃。若相說如俱舍云此
滅有餘有餘說具二涅槃者不然。於捨命時不自

在故。義曰。此隨相說。又小乘義乃至如雜心皆爾。亦違此文。如此論文不言無色界。如大論二十七。生彼界已。若約此文。唯生色界有生般無色。卽無。大論言彼界者。卽是色界。若以義理思之。如身在欲界。未經生斷。第四禪以下。結命終已。生空處。卽生空處。已入涅槃。此卽是何人。答曰。此卽樂定上流。問曰。非經色界等生故。合當小乘無色。那含若名。樂定上流。收者。如斷第二禪等。已下結生第三禪等。卽般涅槃。豈非樂慧上流所收。何故立生般。俱不經二禪地生故。答曰。若以此義。合有生般故。

大論總言生彼界者是。此論唯據色界論。任取一理。前據勝。問。定不定。性人可知。迴心受分段等。與下三人同。至下上流中總釋。

無行般涅槃補特伽羅者。謂生彼已。不由加行。聖道現前。得盡苦際。不由加行者。由宿串習力。無漏聖道任運現前。無功用故。有行般涅槃補特伽羅者。謂生彼已。由加行力。聖道現前。得盡苦際。由加行者。與上相違故。

無行有行般。大乘無行爲勝。以不作加行而得般。故。有行爲劣。作功用行。方得般故。卽並前生般。色

界之上纔生便般。名爲生般。旣生彼已不起。加行而般涅槃。名無行般。生彼處已起作功用而般涅槃。名有行般。俱舍論非婆沙多義。與此論同。薩婆多有行爲勝。以爲有行緣三諦故作有漏行緣二諦故。無行般亦二。緣無爲唯滅四緣無漏滅道二。而得涅槃。有漏難緣得般。無漏易緣得般。故有行勝無行劣。今大乘不然。義如前說。無色界合有此二人難。如生般中。定不定性如下說。今大乘有行得緣四諦理。以無文遮故。斷惑時得緣四諦理。般得有餘無餘涅槃。如生般。

上流補特伽羅者。謂於色界地中皆受生已。乃至最後入色究竟於彼無漏聖道現前得盡苦際。復有乃至往到有頂聖道現前得盡苦際。此中顯示二種上流。一極至色究竟。二極至有頂極至色究竟者。謂多愛味補特伽羅。由多生起煥等靜慮差別愛味。故始從梵眾天乃至色究竟。於一切處次第各受一生。乃至最後入色究竟得般涅槃。極至有頂者。謂不雜修第四靜慮唯避淨居。如前次第生一切處乃至有頂。方般涅槃。

上流中有二種。一樂定。二樂慧。卽生色無色界有

差別耶。如論可知。此二種人皆有全超半超一切處沒。且如樂慧中三人。一全超者。謂從初禪命終生色究竟。二半超。謂生初二三等禪。一、二地已方受生。方生色究竟。此論唯言地地中者。唯據一切處沒作法。此熏禪要在欲界熏生初禪。生初禪已。方始修熏上諸禪。下界初熏色界爲後熏故。數四禪以下色界方成三人熏禪。超禪者。生初禪已後。離下三禪。欲得第四禪。方始熏滿足。如全超人初禪命終已爲已熏。第四禪業。故生第四禪。名全超。

若熏不成或退者。生二三禪後。更熏習。名半超。或前熏時。唯得第二禪。熏命終已。卽生彼處。如是漸生生一切處。名一切處沒。此等人唯避梵天。俱舍論云。以是僻見處。故所以聖人不生。此同雜心。故云。受一生。如俱舍論。唯望淨居。以說超等準思。可解。不繁廣引。有人令雜心同俱舍者。解雜心云。何故說生初禪。以三禪已下。凡聖皆得熏禪。恐不知有熏故。故說極下處云。生初禪。釋此論云。言地地者。謂五淨居。此解有妨。以宗義別不可抑。有缺然相同雜心。義理無妨。樂慧人既爾。樂定人準知。俱

舍論樂定人唯望無色界作。此不還人欲界經生得不還果者是不定攝。欲界凡身得果更不經生得般者是現般義如前說。凡身得果雖未捨欲界身。若決作中般身卽屬中般。生中三人理亦如是。決作上流者卽屬上流所攝。何以得知者。雜心四句初句云當進非不進。謂住欲界梵天。身住欲界未流向上卽上流收。故知餘人理亦如是。初二果上準此則知。此不還人約根地種姓性處所離欲等分別。乃有無量。雜心頌曰。根地及種姓處所廣建立。此等上流望前不還根性是鈍。不能早般故。

若上流中利根不退者未必熏禪。以根鈍者恐退故。故熏禪。且如身在下界不還人。已斷下界欲未離上欲。伏惑得第四禪。起熏禪業。此人命終當生何處。如此妨難如第二卷解滅定中解。

又雜修第四靜慮有五品差別。一下品修。二中品修。三上品修。四上勝品修。五上極品修。由此五品雜修第四靜慮故。如其次第生五淨居。

五品熏禪中云何進義。無漏滋有漏令增勝。如以華莊嚴支提。今云制多是。大論第十二熏何天。準四分定中熏決擇分定與無漏心次第流相生勝。

進等無妨。又四分定中最勝。故若煩惱熏者謂退分。道熏者謂決擇。故淨禪者有二熏。禪所依以第四禪爲所依。下三禪爲能熏。熏彼第四禪以。最勝故。下三禪雖有熏。非勝。故得第四禪。下三禪方能熏爲淨居業。不然。不是依第四禪。熏下三禪。若爾。卽爲熏下禪業。若最勝依依第四禪。熏下三禪。方名勝熏。熏法次第。雖先得下三禪。及至熏時。要先熏第四禪。方能熏下。以當地無漏。熏當地有漏。然後下地亦復如是。以一切禪中最勝。故先熏第四禪。若欲生淨居時。作此熏也。若次第人卽先熏下

地。次第四地熏也。方便無閒道等熏禪之法。若有漏無漏。皆有加行無閒。解脫道皆緣四諦。作十六行觀。初多剎那有漏無漏。後二剎那有漏無漏。乃至成時。一剎那無漏。一剎那有漏。品數多少者。熏禪之法。果有五品。惑有九品。九品之業云何。生果下三中三業。性各唯能感一天生果。上三品業體增猛。故各別生一果。合前五業。若無漏合說。總有十五心。俱舍論說。言心有四十五。後合說前。理思可解。問曰。如七生九惑。中上等上中中下。何故今者中三。遂同下三。惑果。義曰。七生九惑。生多惑多。

五果熏禪惑多生少。何得惑品同九理一難之。問曰五果七生果雖不等如何九惑感果不齊。義曰七生上三業利故感生多。五果業中如何同下感不等。從下至上果漸勝故非彼七生生漸增勝也。小乘愚者攝以蟬翼之風。乍謂同闊土大。衝冠烈鴉。而問大乘達士曰。如前所說微妙甚深。大小理融凡愚難測。雖爾自白駒東馳。年紀既久。多穿鑿異滯者。此已緣覃思麤唯疑。不定種姓根熟迴心分段變易難究。詳妙請申。未聞以開愚昧。何者且

如極七返有七外無生。可知迴心趣大受何生死未得無漏邊際變易之報理。乖分段劫滿三祇七生云何受報。家家一間一來不還。理如斯說。義等前妨。又中般涅槃生結已盡。唯此起結。何義迴心妙覺。既處人天中般。應無根熟。又無色上流無身無相。生彼大乘根熟。無佛何以迴心。且略敘斯之餘疑。已義決。余昔日毗耶緘口以明得意之由。未詳仁者之情。定如息言。摩竭勿窺。越劔能擊。千夫事在否臧。何須大小。麤見前疑。得決今謂。還然願猶審思。詳其理也。於是大乘慈悲普運。愍彼聾瞽。

安詳而慰之曰。勿以曾觀螢光。今驚明日之照。實似跡中涓派。疑同洪海之波。其竊聞重弩千斤。不爲鼯鼠發機。洪鐘萬石。豈爲蓬芒振響。余旣踵杖癡靈。任持佛日。誠矜愚下。爲汝說之。諦聽諦聽。勿異思也。夫非擇滅法。謂有二端。一更不生。二還復起。雖七生外生。皆得非擇滅。以願無漏力。滋感現身。因於三大僧。祇修行菩提行。令感此身業多時。受生死。乃至成菩提。此有何過失。其非擇滅得復生故。中般迴心。更得經生。此復何過。故經中說。如來處中有經二十年。閒教化諸眾生。以此理爲證。

又解其中般涅槃人。由如樂定上流。皆并決定性。以彼無化故。未有根熟。佛不化故。若彼有根熟。佛說應往化。佛無已往化。明知無此人。若非決定性者。中般是居本有無色人。曾居下界。已迴心。訖以此理教。何處生妨。詰曰。中般無色人。聽任此理。其七生人。若已經七生。可如斯解。未經七生。或一二生。已卽迴心。云何通釋。曰。迴心趣大。通學無學。無學待後釋。且釋學曰。或隨煩惱感生勢力。感彼生已。於最後生。伏諸煩惱。起定願力。資後身。因如前道理。乃至成佛。或迴心已。卽伏煩惱。起定願力。資

現身因。如前道理。乃至成佛。徵曰。何故感生已迴。心言滋後身因。迴心伏煩惱云。感現身因。義曰。已伏諸煩惱。不可滋生果。故感生已者。言滋後身因。迴心伏惑。訖言滋現身因。此二種皆永伏故。問曰。此爲分段報。爲變易報。慰曰。諸用無漏定願資助。皆不思議。變易身攝。若煩惱力所感異熟分段身攝。此據實聲聞非變化者。難曰。此變易身何界繫。義曰。隨欲色迴心。卽此界。問曰。此變易身何人得見。答曰。由非天見。何況於人。唯諸聖者之所能觀。問曰。受此變易時。爲捨分段。答曰。不捨。卽以此身。

轉令清淨微妙。難知爲變易生死。問曰。若不捨者。何故舍利子迴心已。法華會上。化火灰身。義曰。爲欲勸勵眾生發菩提心。知舍利子而般涅槃。故別作化身。化火焚燎。其本實身。轉令清淨。其量廣大。其任隨樂不定。徧在處所。值遇諸佛等。無學中方釋。愚者正容而愧曰。道理沖玄。非愚曾見。除疑未決。重請明之。是諸聲聞皆出生死。何故不取寂滅法。爲說令趣大菩提耶。變易生死於三大僧。祇受生死苦惱。義曰。灰身滅智。自利小見。成佛度生。利他兼濟。故勸迴心。變易位中無苦。無過。問曰。行苦。

既有云何無過。義曰。雖經此苦。令得三身功德。無極大喜大樂。故無有過。詰曰。一切大樂。不過涅槃。彼已證得。復何所少。更求菩提耶。義曰。涅槃雖有寂滅安樂。而無受樂。三菩提樂。斷受樂等。無量功德。佛有五樂。涅槃爲一樂。受數爲一樂。卽受用淨土。受法樂等。三菩提爲一樂。卽照理智會如之樂。斷受爲一樂。卽滅盡定。斷受想故。問曰。已得涅槃。無爲之樂。何用行苦有爲樂耶。義曰。三菩提等有爲無漏。是無漏故。猶如涅槃。非行苦攝。又若成佛。能化無量所化。有性出生死故。問曰。有爲無漏。以

無漏故。同彼涅槃。非行苦者。有爲無漏。有生滅故。以有生滅。由如苦集定。是行苦。何故以無漏例彼涅槃。而非行苦。又已成佛者。有化眾生能。何故須更化。義曰。有爲無漏。雖有生滅。已順理故。違生死故。而非行苦。苦集二諦。順生死苦。違眞理故。故是行苦。我以彼生死體。是無漏。由如涅槃。豈得以生滅。便同苦集。又能化所化。無始時來法爾道理。有相屬者。不相屬者。故勸成佛。化彼所屬。不相屬者。卽不迴心。又不教化。於是小乘先生。一悲一喜。而長歎曰。余久流無明海。未知等覺之源。以雖有聞

何如此矣。譬似百餽之饌。乍吞善一味。猶言至道先聞已奇。誰念婉轉。彌幽徘徊。轉妙雖研。精自古難得聞。是理焉。實謂前賢所不覲。曩哲所未聞。其達士舉手摩頂。善慰之曰。世士頑駘。不可笑乎。唯見善而從。實爲奇特。識機達理。今古所喜。覩理不從。自貽伊咎。汝旣遊佛海。須識素璞之岑。探頤挺奇。惟貴珠而兼濟。豈不聞小乘神化。惡知識等。早可迴心。發弘大願。悟者長跪禮足而退。曰。豈非宿緣有幸。感惡斷賢。旣蒙進大能。不聞唯命。幸甚。幸甚耳。其現般等人。義思在初果。若迴心者。或如七

生人。迴心已伏惑者。滋現身因。以現般不肯伏惑。如前解有妨。若爾。如七生已迴心人。滋後身因。此後身爲此受果。爲後身受果。若此身受果。云何後身業。令感今身果。若感後身果。應捨身而取後報。有妨問。釋曰。捨此身受後身。方作無漏。無妨也。其文亦有不定。姓人及餘上流生中三人等。準思解以上據佛地論第二卷。如大論五十七二十二根中云。若預流練時得練根。亦得一來。不證不還。對治難得故。所應得義極廣大故。若先用世間乃至伏四禪入現觀。得不還。先修練根時進難故。亦不

證無學。如前因故。根轉已後一切皆證。若以義預流何故不得不還也。

退法阿羅漢者。謂鈍根性。若遊散若不遊散。若思惟若不思惟。皆可退失現法樂住。思惟者欲害自身。不思惟者不欲害自身。退現法樂住者。謂退世間靜慮等定。

退法以下釋六種羅漢。此六種前五隨信行。後隨法行。若有六種中得一切法已。更不能勝進。卽般涅槃。此文中言不練根。乃至必退等定者是也。此據決定。此六種中各別種姓。若有從初退法轉化

不動者。此非六中決定各別性人。以信行能轉化。法行故。前五旣不得現法樂住。是慧解脫人。後一有定莊嚴。是俱解脫。若望轉化等如前。此六人據雜心二說。一說六種中前四唯欲界。以必定退不能練根住法。不動性是利根通三界。有以退者依退具故。上界無退具。二說何必退者必定卽退。以種姓而論。故言退。以種姓故。彼六通三有。又此六通定不定性。生無色界必非不定性。以無善友可發心無語言故。若下二界不定性者。依第四禪邊際無漏勝定。以定願力數資。昔感現身。因令於長

時生果相續漸增勝乃至成佛功能方盡此報
雖說有漏因感然由無漏定願資助名不思議變
易生死以無漏定願不思議故如楞伽經無明爲
緣無漏業爲因者此以無漏勝資故故說無漏爲
因有大力故無明若無無漏不能資故籍無漏力
方能資業資業無明其實親因以假他資故故說
爲緣廣解如別章言無明者謂小乘無學執有實
佛可求眾生可度等問曰此無明卽現所作不染
無知何故資此令業相續義曰以無明爲業助緣
故無漏資時能令業增壽行此無明卽似助緣如

小乘無學定力知將欲涅槃以衣鉢捨與眾僧爲
此有漏業事後以無漏邊際定資此善根令今此
身多時得住此義稍有相似又無明者卽昔此身
業問如顯揚十六云迴心聲聞依變化身而得佛
果非報身得答三義品依無漏定資名變化身非
實變化身同也其身雖住由如變化故廣如別章
餘義如上廣如佛地論第三卷說四種聲聞迴心
等文如別記問退法中言欲自害者謂如瞿曇比
丘自害等此中言退者不如小乘退卻至初果如
大論二十六此中唯退有漏定名退非失果名退

廣如下得果捨向中明。乃護法心可知。

思法阿羅漢者。謂鈍根性。若遊散若不遊散。若不思惟。即可退失現法樂住。若思惟已能不退失。護法阿羅漢者。謂鈍根性。若遊散便可退失現法樂住。若不遊散。即能不退。住不動阿羅漢者。謂鈍根性。若遊散若不遊散。皆能不退。現法樂住。亦不能練根。練根者。謂轉下鈍根成上利根。是故不動法不說能練根性。是利根故。

住不動中練根者。以下乃至是利根故。以來此中。意言此人不能練根。練根已。即成利根。故下不動

是第六人。既是利根。不說能練根。此卻遮成練根。已更不練根。明知練者。謂練下成上。又釋言此中。意明鈍根方練成上根。有鈍根者。不能練根。以成上利。是故此不動法。不說能練根。是利根故。可具讀之。以不說言。取安二處。謂不說能練根。不說是利根故。此不動。雖是鈍根。不能練根。言不動法者。即是此住不動。語略。故言不動法。非是第六不動法人。如此論。但言一人練根。如大論五十七。二十二根中云。一切有學及無學。五即退思護住。堪達此人能練根。非諸獨覺。亦非菩薩。性利根故。今此

論不動亦利根故不練根。彼論約大分爲論故。不言此不動。

堪達阿羅漢者。謂鈍根性。若遊散若不遊散皆能不退現法樂住。堪能練根。不動法阿羅漢者。謂利根性。若遊散若不遊散皆能不退現法樂住。

何故此論一無學練根。謂堪達大論五人也。且義曰。此論堪達一種進次第得練根作法。餘四唯得決定。此退思等人更不練根者作法。彼論據實知前五人皆得練根。次第六人亦已說訖。又此中言非諸獨覺及諸菩薩能練根者。如下此論第十四

卷末自會之。獨覺與菩薩相似。如大論二十六云。此六人合爲二。一時解脫卽容退靜慮。廣如彼釋。二謂不動法卽第六人。若以此義。前五人中雖鈍有不退者。故非一切皆是時。若鈍義解時。前五容爾。謂細分別由三種滿。一根滿。不動法人。二定滿。如前應知。三一切無學。皆由果滿。如大論五十七廣說。論云。遊散見斂攝心思惟義。如文釋。如雜心有二方便。一常。二頓。退思二種皆無二方便。退思相似。但思法以堪能思願爲異。俱并持刀自害。護法人具常方便。住不動人具頓方便。旣更無解不

知具常方便。不以前人具故。此亦合故。準知堪達人亦具常頓。與前護法練不練根爲異。第六一種姓卽利根。具二方便。廣如彼解。大論第六十四有十三補特伽羅。同此。彼無此菩薩無生無色界。欲界異生補特伽羅者。謂於欲界若生若長。不得聖法。欲界有學補特伽羅者。謂於欲界若生若長。已得聖法。猶有餘結。欲界無學補特伽羅者。謂於欲界若生若長。已得聖法。無有餘結。如欲界有三。如是色無色界各有三種。隨相應知。欲色界菩薩者。謂與滅離無色界生靜慮相應。住靜慮樂。而生欲界或生色界。

問。何緣菩薩不生無色界。答。若已證得最勝威德菩薩。凡所受生。皆欲利益安樂有情。以無色界非成熟有情處故。滅離無色界生靜慮者。謂能除遣無色界生所有勝定。住靜慮樂者。謂不退靜慮。由此菩薩善巧迴轉。故爲欲成熟所化有情。或生欲界。或生色界。欲色界菩薩中。謂與滅離無色界生靜慮相應者。謂入眞已去菩薩不生無色界。以彼無利他行故。故菩薩滅離無色界生。而此菩薩與勝定相應。故滅離無色界。又勝靜慮樂。而菩薩與此相應。住此靜慮而生欲色離無色界生。言最勝威德者。大論

等皆云最勝是八地以去無生法忍菩薩若依此解第二僧祇菩薩不生無色彼無教也。初地以去菩薩同證真理生佛淨土居最勝威德以具五分法身超初劫故。大論七十八初地以上地地皆有威德。此解八清淨中文。今義準初劫菩薩修菩提行亦能利他恆須聽法居煖等位是色界繫亦不生無色。此論得自在解。如初劫菩薩修得無色定爲未自在亦可生無色。初地以去位得自在故言不生。若據願意知彼無利他故亦不生彼。據勝位語故不生彼。住靜慮以下謂此菩薩善巧迴轉於

欲色界隨願卽生以不爲業煩惱所繫猶如毒藥已被呪訖不能爲害。若約此義八地以去名最勝威德非無分段於下二界處處利生故。云何得言八地以去捨蟲身而得變易。如大智度論初地已去何妨亦同變易身也。以非業繫得勝意故爲約此義大義曰初地以去菩薩得自在故或受變易或受分段。若於淨土聽法或行利他行須使天人見豈不作分段身也。以變易身非天人見故言八地以去者據無功用相及無漏相續語據實直往菩薩初地得變易須捨卽得而取分段亦得如佛

地論迴心人資現身資後身等。其迴心人得初地已得如是分段受生得自在故隨願生故。未有直往及迴心人不得第四禪者。雖不斷修得定無妨。又此菩薩命根隨受生處繫。非如變易身在別爲一段身生彼色界。此命根欲界繫若隨見身相。色界繫。如第六卷菩薩受生非愛潤生唯以願力。故得下二界隨處卽受生。三惡趣亦以善業果亦善業果願生彼故。非如鬼傍果亦不善報故。欲界獨覺者謂無佛出世時。生於欲界。自然證得獨覺菩提。

其獨覺雖無佛時出世。出世已卽佛出世。佛出世卽便來就如來教化。此據不定性人。若定見佛不見佛俱般涅槃。廣如前釋。

不思議如來者。謂但於欲界始從示現安住觀史多天妙寶宮殿。乃至示現大般涅槃。示現一切諸佛菩薩所行大行。一切菩薩所行者。謂從示現觀史多天宮乃至現大神變降伏魔軍。諸佛所行者。謂從示現成等正覺乃至示現大般涅槃。

不思議如來中一切菩薩行一切如來行等。此說八相。諸論不虛傳。勘問如別記。以如來純無漏出

三界不可思議不同菩薩等。

不思議如來中。若法報身不可論界。故化身中說
欲界行相。華嚴八相。如法華疏。

勝解行菩薩者。謂住勝解行地中。成就菩薩下中上
忍。由其安住菩薩種姓。始從初發大菩提願。乃至未
入極歡喜地。未得出世真實內證。故名勝解行菩薩。
增上意樂行菩薩者。謂十地中所有菩薩。由已證得
出世內證清淨意樂。故有相行菩薩者。謂住極喜離
垢發光燄慧極難勝現前地中所有菩薩。由此六地
雖不喜樂而爲諸相所間雜。故無相行菩薩者。謂住

遠行地中所有菩薩。由此菩薩若作功用乃至隨其
欲樂能令諸相不現行。故無功用行菩薩者。謂住不
動善慧法雲地中所有菩薩。由此菩薩已得純熟無
分別智故。

其勝解行中前論本唯言三品忍位。以取滿位分
彼第一法唯一刹那。故不說三十心爲忍。非決擇
分中忍。地前五忍中伏忍攝。故又解準下四善根
爲三品忍。燸爲下頂忍。爲中第一法爲上。唯有此
勝地位短者。據彼說。增上意樂攝論等。唯初地以
初得無漏故。一地者名有相地。此中據不同初得

但無漏者說通十地。

復次如說預流補特伽羅。此有二種。一漸出離。二頓出離。

頓二滅中。

文衍

上來別解七種補特伽羅。此下第二

顯其二果。於中有二。初標列。後別釋。

漸出離者。如前廣說。頓出離者。謂入諦現觀已。依止未至定。發出世閒道。頓斷三界一切煩惱。品品別斷。唯立二果。謂預流果。阿羅漢果。品品別斷者。謂先頓斷欲色無色界。修道所斷。上品隨眠。如是乃至煖煖品。頓斷三界者。如見道所斷。非如世閒道界地。漸

次品品別斷。

別釋爲二。第二頓中分三。一顯頓行相。二引證。三

釋不定。行相中初論本。後釋師。唯依未至地等。如

唯識樞要。

此義以何爲證。如指端經說。諸所有色。乃至識。若過去。若未來。若現在。廣說。乃至若遠若近。總此一切。略爲一分。一團。一積。一聚。如是略已。應觀一切。皆是無常。一切皆苦。乃至廣說。依如是觀。但可建立初後二果。由此二果。如其次第。永斷三界一切見修所斷煩惱。無餘所顯。故不立第二第三兩果。由此二果。已見

諦者唯斷欲界修道所斷有餘無餘所顯故。

引證中初問後答有二。初引行相經。後引二果潤行相經中。初引後釋。爲一分一團一積一聚者。無常苦空無我四行。加行如次配之。後正起四行。依如是觀下釋此論文。

又依如是頓出離者。如來於分別經中。預流果無閒。卽建立阿羅漢果。

二果中何故二三果中不作。乃至有頂取上品惑斷成第四果。而治斷惑唯初果耶。有此分。有缺文

如是補特伽羅多於現法或臨終時善辨聖旨。設不

能辯。由願力故。卽以願力還生欲界。出無佛世。成獨勝果。設不辨者。未能無餘離諸欲故。卽以願力生欲界者。彼能速證般涅槃故。

第三釋不定中。此通定性不定性。定性者。臨終辨旨得阿羅漢。不辨者。不定性轉爲獨覺。必無定性。經生進者。但可不定性得阿羅漢。更練根成眾出。此義應思。阿羅漢得眾出。有何差別。若不定性。必不得阿羅漢。轉得眾出。無別相故。或此取二果。唯不定性人根利故。所以說不辨轉成眾出。何故不須經生正成阿羅漢。以經修習。隔生勝修練根性。

故生欲界速般涅槃也。潤生厭心勝故。此非別求必生上界。不定性人上界無故。根性利故。非復徵惑而生修故。

臨終等時辨聖旨者。謂初果得第四果時。未知緣覺斷惑爲地次第。爲如據羅漢九地九品。此中妨問思之。

△第二大段釋現觀中大文分三。一明現觀。二明現觀所修法。第三雜明現觀位諸義。初中有二。初明十現觀。次明差別。

第二大段廣現觀所證中分三。初總明現觀。次明

現觀差別。後明諸功德現觀所攝。

建立現觀略有十種。謂法現觀。義現觀。真現觀。後現觀。寶現觀。不行現觀。究竟現觀。聲聞現觀。獨覺現觀。菩薩現觀。法現觀者。謂於諸諦增上法中。已得上品清信勝解。隨信而行。所以者何。由於諸諦增上契經等法中。從聞他音。增上緣力。已得最後順解脫分善根所攝上品清信勝解。由得如是清信勝解。故說名以法現觀。現觀諸諦。義現觀者。謂卽於諸諦增上法中。已得上品於諸諦境諦察法。忍此忍居順決擇分位。所以者何。由卽於如上所說法中。如理作意增上。

他音而證得故。名聲聞現觀。獨覺現觀者。謂前所說七種現觀。不由他音而證得故。名獨覺現觀。菩薩現觀者。謂諸菩薩於前所說七現觀中起修集忍。而不作證。爲於聲聞獨覺調伏方便中得善巧故。哀戀有情不於下乘而出離故。然於菩薩極喜地中入諸菩薩正性決定。是名菩薩現觀。

初中分二。初標列。後別釋。此中現觀明上地信唯識等通有漏信。初復有二。初標列十。後隨別解。其十現觀。初者有云。唯有漏三慧爲體。第二決擇分爲體。今解有二。以六中思慧爲初。今初二以思

慧爲體。此有初後初緣教起後緣義生。從境爲名。以法義體卽思觀。由此思識諦察忍成三種。一云。初是前方便三慧。後是四善根。與十八相攝中善根稱現觀。取其真後不同。此依見修爲真後。唯識等依本後二智亦不相違。互據一義。應思勘之。或法者思現觀。雖亦緣理。以法增故。依法觀諸法。故義卽四善根。修慧緣義生故。唯識等以作用狹。故不說此。以親生無漏故。說諸功德。如顯揚三十九增減多少。廢立下釋其義。現觀以修慧爲體。未知此六觀中何者收其自解。如喜根等思之。此品

現觀問以依地說界等。如大論七十二顯揚十七卷。此中真後各以正智後得智爲體。與大論相違。勘其真現觀中得修。修俗智。小乘三諦。以道諦類。智是修道。今大乘四諦。以道諦見道故。何故修道無漏智邊不修俗智耶。

已說現觀差別。今當說問。聲聞菩薩現觀有何差別。答略說有十一種。謂境界差別。任持差別。通達差別。誓願差別。出離差別。攝受差別。建立差別。眷屬差別。勝生差別。生差別。果差別。

現觀十一種中與攝論第六次第名字不同。此中

增眷屬彼處無此。此少彼斷煩惱。彼第六七總名清淨差別。與修治佛土一處明故。此以少淨因中未足在果方圓。斷煩惱習在果差別。彼明清淨有二。所治淨所修淨二體別故。不論眷屬。此中勝生別名生別。生如來家故。此中生差別。彼云受生差別。意不相違。

現觀差別中與攝論第六名字前後有少不同。

境界差別者。謂緣方廣大乘爲境故。任持差別者。謂滿大劫阿僧企耶。福智資糧圓滿故。通達差別者。謂由補特伽羅法無我理。增上法方便所引出世閒智。

俱通達二無我故。誓願差別者。謂能通達一切有情與已平等。猶如自身。誓願攝益故。出離差別者。謂依十地而出離。故攝受差別者。謂無住涅槃所攝受。故建立差別者。謂善修治諸佛淨土故。眷屬差別者。謂攝受一切所化有情爲眷屬故。勝生差別者。謂如世閒腹所孕子。繼父種族。令不斷絕。如是菩薩紹隆佛種。令不斷絕。是名佛真子相。故生差別者。謂於如來大集會中生。故果差別者。復有十種。謂轉依差別。功德圓滿差別。五相差別。三身差別。涅槃差別。證得和合智。用差別。障清淨差別。和合作業差別。方便示現。

成等正覺。入般涅槃差別。五種拔濟差別。轉依差別者。謂染不染一切種所依。麤重永斷。故一切無上功德所依。永轉。故功德圓滿差別者。謂力無所畏。不共佛法等無邊功德。永成滿。故五相差別者。謂清淨等五相差別。一清淨差別。謂永斷一切煩惱。并習氣。故二圓滿差別。謂徧修治佛淨土。故三身差別。謂法身圓滿。故四受用差別。謂一切時處大集會。與諸菩薩受用種種大法樂。故五業差別。謂隨其所應起種種變化。徧於十方無量無邊諸世界中。作諸佛事故。三身差別者。謂證得圓滿自性受用。變化身故。涅槃差

別者謂於無餘涅槃界爲欲利樂一切有情一切功德無斷絕故。證得和合智用差別者謂證得最極清淨法界一味故。於彼能依一切種妙智。用一一佛功能等一切佛功能故。障清淨差別者謂永斷一切煩惱障所知障故。和合作業差別者謂化導一一有情作用皆一切佛增上力故。方便示現成等正覺入般涅槃差別者謂於十方一切世界隨其所應乃至後際數數示現成正覺等令一切所化有情成熟解脫故。五種拔濟差別者謂拔濟災橫等五事。一拔濟災橫。謂如來入城邑等時。令盲聾等得眼耳等。二拔濟

非方便。謂令得世間正見。遠離一切邪惡見故。三拔濟惡趣。謂令生見道。越諸惡趣故。四拔濟薩迦耶。謂令證阿羅漢果。永脫三界故。五拔濟乘。謂令諸菩薩不樂下乘故。

果差別中方便示現成等正覺等者攝論第九說八相之中。此雖有住天宮。彼無勘問。

問。如經說四無量等最勝功德。何現觀所攝耶。

第三現觀所攝功德中有三。初問答。次隨前各以五門解釋。後明功德作業。初中有二。初問。後答。如經中說四無量等下。第二大段明現觀所攝一

切諸法有二。初問。後答。

答。後現觀究竟現觀所攝。所以者何。如是最勝功德。諸聖弟子等。或於修道。或究竟道之所發起。是故二現觀所攝。

答有二。初答攝。後列其名。

答中初答攝。後別徵顯。

彼復云何。

別徵顯中分二。初徵。後釋。

謂無量解脫勝處。徧處無諍。願智無礙。解神通相。隨好清淨力。無畏。念住。不護。無忘失法。永斷習氣。大悲。

十八不共佛法。一切種妙智。如是等功德。如來於諸經中。或依聲聞乘說。或依大乘說。此諸功德。隨其所應。略以五門顯示其相。謂所依境界。行相。自體。助伴。五門釋中有二。初標五門顯示其相。後隨別釋。釋中有三。一列名。二釋論生下各五門釋。後隨別釋。

無量者。謂四無量。一慈無量。二悲無量。三喜無量。四捨無量。慈云何。謂依止靜慮於諸有情。與樂相應。意樂住具足中。若定若慧。及彼相應諸心心所。此中顯慈無量。以靜慮爲所依。有情爲境界。願彼與樂相應。

爲行相定慧爲自體一切功德皆奢摩他毗鉢舍那所攝故諸心心所爲助伴當知悲等一切功德隨其所應亦爾悲云何謂於諸有情離苦意樂住具足中若定若慧餘如前說所依自體助伴與慈相似故喜云何謂於諸有情不離樂意樂住具足中若定若慧餘如前說捨云何謂依止靜慮於諸有情利益意樂住具足中若定若慧餘如前說利益意樂者謂於與樂相應等有情所棄捨愛等作是思惟當令彼解脫煩惱如是意樂名捨行相利益意樂行相圓滿名住具足。

無量有二初列後釋。

隨別釋有三初明五門別解次明引發後別明此二十功德作業五門別解中分十七段解脫勝處徧處三一處明故相隨好一處明故瑜伽第十二說一切爲三有情一無苦樂二有苦三有樂次第起初三於三起於離欲貪瞋等故所緣廣大故利益安樂思惟最勝故果無量故由此三義名無量住具足者圓滿清白名具足所修觀行日夜專注時專注故名注故此下文云利樂行相圓滿名住具足第三十四論以無欲無瞋無貪三法爲體如

次緣三種有情故。顯揚論第四唯以無貪瞋二。以除違損二位故。彼緣如次三有情故。又審勘四無量。大智度論謂前三無瞋爲體。後一無貪爲體。與樂拔苦喜益三位淺深成別。佛地論云。是平等智。佛果無漏。二乘地前唯有漏七地。已前通二。八地以上此無漏。此下第十四起用後得世俗智攝。自性無分別智攝。智度論此四緣。眾生緣緣假似名。名眾生。法緣緣五蘊。無緣緣畢竟空。涅槃第十五。眾生緣緣貧家眾生。法緣緣一切資生起。無緣緣如來菩薩地。四十四說。初與外道共有我相故。次

與二乘共有法相故。後不與共。佛地論依初發心起眾生緣。正行位菩薩修法緣。大乘教法爲境。此二多有漏。無生法忍菩薩修無緣緣法界故。悲喜捨亦爾。涅槃經說故。菩薩地第三十四說。三行相以通四種大好。仍所治與古涅槃不同。相違此中論說利益安樂與四十四準論中同。十二云。同一切處。四十四所緣法者亦緣五蘊身別別法。有情假者。法是別法。無緣謂真理。與佛地不同。會之。四無量慈心無瞋。悲心不害。喜心不嫉。捨心無貪。瞋。如顯揚二十及第四菩薩藏經說。慈中有三種。

謂有情緣法緣無緣。有情緣者緣眾生起。法緣緣三輪清淨除執起。無緣者謂佛緣其涅槃。以無貪是慈體。以從法緣中資具說。境界唯欲界。所依唯六地色界近遠怨等。勘大論七十三顯揚等。解脫者謂八解脫廣說如經。

釋八解脫勝處徧處。合文有二。初別解。後釋次第。初解脫有三。初標指。次別釋。後料簡。

八解脫觀。大論五法中世間智收以慧爲體。下勝處徧處亦爾。若如前三解脫無貪善根性。後四四蘊性大乘五蘊性。滅盡唯以滅盡定爲體。皆通漏

無漏。大論七十三云異生得故。法師解大論世間正智二說同異。生又是有漏。若爾。以後得智爲所遺漏。此有理觀。謂正智中義有攝故。如大論七十三。二二十二說。成實論云。是無漏非究竟。謂解脫究竟非無漏。謂徧處俱者。謂勝處。是無漏非果。故非究竟。果中有體非無漏。是究竟非無漏。是果體無漏俱說同。薩婆多。

云何有色觀諸色解脫。謂依止靜慮於內未伏見者。色想或現安立見者。色想觀所見色住具足中。若定若慧及彼相應諸心心所。乃至爲解脫變化障。有色

者。謂於內身未依無色定。伏除見者色想故。或見者色想安立現前故。觀諸色者。謂以意解觀見好惡等色故。解脫者。謂能解脫一切變化障故。云何內無色想。觀外諸色解脫。謂於內已伏見者色想。或現安立見者無色想。觀所見色住具足中。若定若慧。餘如前說。內無色想者。謂於內身已依無色定。伏除見者色想故。或見者無色想安立現前故。謂見者名想現在前行。餘如前釋。云何淨解脫身作證具足住。謂於內淨不淨諸色已得展轉相待想。展轉相入想。展轉一味想故。於彼已得具足中。若定若慧。餘如前說。乃至

爲解脫淨不淨變化煩惱生起障。此中顯示於淨不淨諸色依展轉相待想。展轉相入想得。展轉一味想。所以者何。待諸淨色於餘色中。謂爲不淨待不淨色於餘色中。謂爲清淨非不相待。何以故。唯見一類時淨不淨覺無故。又於淨中不淨性所隨入於不淨中淨性所隨入。何以故。於薄皮所覆共。謂爲淨中現有髮毛等三十六種不淨物故。如是展轉總一切色合爲一味清淨想。解如是已得隨所樂色解脫自在者。能斷淨不淨色變化障。及於此中煩惱生起障。何等名於變化煩惱。謂於淨色變化加行功用與不淨色

變化相違故。

別釋有五。合四無色解脫相故。瑜伽第十二解脫勝處徧處皆悉明之。廣應如彼。

此中初言依解脫造修以解脫爲先等者。此依始觀說成實論以徧處爲因者。是成就者說。卽此中解脫究竟。大論六十二。同以解脫爲果。如彼鈔會得起時依定斷障。勝處及諸徧處等大精。前二解脫成實論通四禪。薩婆多唯初二禪。今法師云看下文聖多住此二。同薩婆多唯初二禪。未知竟有何意。問有人云以近欲界故。此緣下界。三禪有樂

名順解。不說第三解脫。唯第四定以成滿故。

云何無邊虛空處解脫。謂於隨順解脫無邊虛空處住具足中。若定若慧。餘如前說。如無邊虛空處解脫。無邊識處無所有處。非想非非想處。解脫亦爾。乃至爲解脫。寂靜解脫。無滯礙障。如是四種。若聖弟子所得能順無漏。是清淨性。方名解脫。解脫愛味故。寂靜解脫者。謂超色無色。於中清淨名無滯礙味著無色。是此障。

其空處等皆以九品解脫離諸下地欲時爲體。小乘廣論現在修六。未來三。故知唯第九品解脫道。

爲空等解脫。其空法師於同地振響廣論。現在修一未來三。故知皆九品解脫。爲廣論文錯。不取無閒道。以趣向故。非順解脫。內凡夫亦得此淨定。能順無漏。非如外異生外道故。雖得淨定。不順無漏。非解脫。寂靜解脫者。法師二釋。一謂得無漏。二有漏定。上勝下故。說超色無色。

云何想受滅解脫。謂依止非想非非想處解脫。超過諸餘寂靜解脫。住於似真解脫具足住中。心心所滅。爲解脫。想受滅障。此顯想受滅解脫。以非想非非想處爲所依。無境界行相助伴。心心所無故。以心心所

滅爲自體。又此解脫似真解脫。圓滿爲性。以聖弟子由出世閒道已得轉依。諸心心所暫不現起。於此位中極寂靜故。染汙意不現行故。此八解脫亦名聖住。諸聖所住故。然諸聖者多依二住。謂第三第八。以最勝故。是故經中於此二解脫有身作證具足住言。非餘。由此二種。如其次第。有色無色解脫障斷無餘故。證得圓滿轉依故。說名最勝。勝處者。謂八勝處。廣說如經。前四勝處由二解脫所建立。後四勝處由一解脫所建立。從彼所流故。所以者何。謂內有色想觀外色少。若好若惡。若劣若勝。於彼諸色。勝知勝見。得如

實想是初勝處。內有色想。觀外色多。若好若惡。廣說乃至得如實想。是第二勝處。此二勝處從有色觀諸色。解脫所出。內無色想。觀外色少。廣說乃至得如實想。是第三勝處。內無色想。觀外色多。廣說乃至得如實想。是第四勝處。此二勝處從內無色想。觀外諸色。解脫所出。是故前四勝處。由二解脫所建立。內無色想。觀外諸色。若青。青顯。青現。青光。猶如烏莫迦華。或如婆羅痾斯深染青衣。若青青顯。青現。青光。如是內無色想。觀外諸色。若青。乃至青光。亦爾於彼諸色。勝知。勝見。得如實想。是第五勝處。內無色想。觀外諸色。

若黃。乃至黃光。猶如羯尼迦華。或如婆羅痾斯深染黃衣。若黃廣說。乃至得如實想。是第六勝處。內無色想。觀外諸色。若赤。乃至赤光。猶如般豆時縛迦華。或如婆羅痾斯深染赤衣。若赤廣說。乃至得如實想。是第七勝處。內無色想。觀外諸色。若白。白顯。白現。白光。猶如烏沙斯星色。或如婆羅痾斯極鮮白衣。若白白顯。白現。白光。如是內無色想。觀外諸色。若白白顯。白現。白光。亦爾於彼諸色。勝知。勝見。得如實想。是第八勝處。如是四勝處。從淨解脫身作證具足住所出。此中解脫是意解所緣。勝處是勝伏所緣。少多等境隨

意自在。或令隱沒。故或隨欲轉。故少色者。有情數色。其量小。故多色者。非有情數色。舍林地山等。其量大。故好色惡色者。淨不淨顯色所攝。劣色勝色者。若人若天。隨其次第。於彼諸色。勝者自在轉。故知者。由奢摩他道。故見者。由毗鉢舍那道。故得如實想者。謂於已勝未勝中。得無增上慢想。故若青者。是總句。青顯者是俱生青。青現者。是和合青。青光者。謂彼二所放鮮淨光。青如青。黃赤白廣說亦爾。於一處說二譬喻者。爲顯俱生和合二顯色。故謂若青者。總舉華衣二青。青顯者。依華青說。以俱生故。青現者。依衣青說。以

和合方成。故青光者。依二種說。由彼二種。俱有鮮淨光。故如是二譬喻中。若青青顯等。總句釋句。如相應知。如青黃等亦爾。餘如解脫中說。何等爲餘。謂內有色。想觀外色等。如有色觀諸色等。隨相應釋。已說勝處勝所緣境界。

勝處中後四不說外無色。唯說內無色。有何意說。從第三解脫流出故。

徧處者。謂於徧滿住具足中。若定若慧。及彼相應心。心所。是名徧處。徧滿者。其量廣大。周普無邊。此復十種。謂地水火風青黃赤白。無邊空處。無邊識處。皆悉

徧滿。問。何故於徧處建立地等。答。由此徧處觀所依能依色皆徧滿。故若於此中不建立地等徧處者。卽離所依大種亦不能觀青等所造色爲徧滿相。是故爲觀所依能依皆悉徧滿建立地等。餘隨所應如解脫中說。謂無邊空處等。當知此中依解脫故造修。由勝處故起方便。由徧處故成滿。若於彼得成滿卽於解脫究竟。

徧處中涅槃經取無所有處不取火大。法師以唯壞世閒故不取。大論等取者。以無所有處少緣非徧故。不取聲香味三塵者。以上界無故。非徧不說。

如大論解六十九。諸智攝智三解脫門攝十智等中。諸功德并在中。大精。

十一切處涅槃經不說火加無所有處。

大乘阿毗達磨雜集論述記卷第二十七

